

四庫全書

集部

欽定四庫全書

集部

粵西詩載卷一至四

詳校官庶吉士臣瑚圖禮

主事銜臣徐以坤覆勘

總校官庶吉士臣朱鈐

校對官庶吉士臣吳裕德

謄錄監生臣宋學濂

欽定四庫全書

集部八

粵西詩載

總集類

粵西文載

總集類

粵西叢載

總集類

提要

臣等謹案粵西詩載二十五卷粵西文載七
十五卷粵西叢載三十卷

國朝汪森撰森嘉興人官廣西桂林府通判其在

粵時以廣西志缺畧殊甚考据難資因取歷代詩文之有闕典故者詳搜博採歸田後復借朱彞尊家藏書薈萃訂補共成詩載二十四卷附詞一卷文載七十五卷又以纖小諸類不獲入文者更輯為叢載三十卷其蒐採殊見廣備中間如錄謝朓詩悞為晉人又唐鄭愚蔡京授嶺南節度使二制本文苑英華所引玉堂遺範之文初無撰人姓名乃訛玉

堂為王堂此類亦頗有舛誤然其體例明整
所錄碑版題咏之作多志乘所未備其文載
中所分山川城郭官署學校書院宮室橋梁
祠廟軍功平蠻諸子目皆取其事之絕有關
係者故所收于形勢扼塞控置得失興廢利
弊諸大端紀錄尤詳洵能得其要領以視曹
學佺全蜀藝文志瞻富不及而謹嚴殆為勝
之至叢載分為二十目所錄雖頗近瑣碎而

遺文軼事有裨考証者悉已採輯無遺于一
方文獻亦有可藉以徵信者焉乾隆四十四
年四月恭校上

總纂官

臣紀昀

臣陸錫熊

臣孫士毅

總校官

臣陸

費

墀

欽定四庫全書

粵西詩載卷一

桂林府通判汪森編

四言

喻猛歌

漢和帝時蒼梧太守喻猛以清白為治郡人頌之

於惟蒼梧交趾之域大漢唯宗遠以仁德

。淳熙四年二月既望靖江守臣張某奉詔勸農于

郊乃作熙熙陽春之詩二十四章四句以示父

老俾告于其鄉之人而歌之

宋 張 栻

熙熙陽春既發既舒翼翼南畝是展是圖 嗟爾農夫
各敬乃事往利爾器誠爾婦子 惟生在勤勤則及時
惟時之趨時不爾違 祈祈甘雨膏我下土習習谷風
和澤乃普 往即爾耕惟力之深往蒔爾苗勿倦其耘
于日于夕自遂自達爾心勿忘彼生孰遏 惟天之
心矜我下民民不違天使爾有成 既穰既實既堅既
好爾穫既周先養爾老 保爾家室撫爾幼穉既迄有

年復思嗣歲 嗟爾父老其訓其誠俾務於本惟土物
愛 不念其本則越其思所思既越害斯百罹 嗟爾
父老其告其喻爾之有生君實覆汝 尊君親上其篤
勿忘小心畏忌率于憲章 嗟爾父老教之孝悌孰無
父母與其同氣 反于爾心孰無愛敬即是而推烏往
不順 嗟爾父老勿替諄諄其未率從警厲其身 告
以禍患其使知懼無俾蹉跎以蹈罪罟 惟國之法曷
曠其垂使爾知避豈欲爾施 爾或自陷予疚予恫曷

使予懷寘于爾衷 於赫聖王敷德流澤布宣弗厯時
予之責 咨爾父老助予念茲豈予之助報國是宜
粵以今日勸相于郊乃作此詩以懋爾勞 咨爾父老
尚演厥義其諷其歌于鄉于里 俾一其心服我訓言
擊鼓坎坎自古有年

傲暑棲霞洞

李彥弼

嵌竇棲霞歆虛轉杓左騖鸞翼右耳鳳簫爽排酷烈境
邈氛囂靜者多妙於焉消搖

潯州南山

陳 謹

天造其山在貴之陽二十四峰拔地峭剛其山維何如
彼玉蒼宅位於離火德之祥南山何有有方其巖若堂
甚夷若門者三穹者圜蓋植者羽參石像天成匪鑿匪
剗陟彼山巔有洞益竒南北戶通千里頻闕伊晉之洪
采榮於斯丹飛井雷木潤草滋昔我太宗雲章下賁於
皇仁廟奎文狎至巖處有輝神護孔閎丕昭聖朝聲化
遠暨南山不騫天子萬年南山不朽天子萬壽無量惟

金定巳丑卷之二
卷一
壽與天齊久小臣作詩永颺於後

贈南溪郭顯

栖霞子

有宋開國幾二百年金兵入汴衣冠南遷桂獨宜人歲
無嵐烟溪山之勝間出神仙沁源郭顯志慕精專卜築
崑下鑿井耕田榜揭歸雲養真自然燒煉丹藥徜徉林
泉峨峨巖壁排空插天

題水月洞

元
陳孚

鐵崖萬仞鬼斧所鑿長嘯一聲白雲驚躍

藤江雨中

明
湛若水

臘月既望我徂自藤雲木翳翳零雨其冥有山如戟有
石如城雲餐雨立僕夫子征聯我蘭舟與子同行念彼
室處感茲靡寧

愛日二首

愛日歎時命也自廣徂橫且霾且雨僕夫告勞

瞻彼愛日實慰我心自我室處天光下臨我行千里彌
月霾陰僕夫痛矣修途阻深我行不偶昊天何心

愛日熙熙目擊我思于盤之子爾暄爾曦自我彌旬風
雨淒淒我心憂矣阻于塗泥實命不偶昊天何私

平南遣興

漁淵水深采芝雲迷寄懷雲水抗志高棲嚴霜隕木歸
鴻背飛天寒日短途長行遲歲云暮矣我心則悲神遊
八極身圓兩儀宇宙為旅萬物為徒

賀張總戎凱旋詩

并序

潘恩

皇帝統極布昭文武薄于嶺海罔不咸賓惟古田之

夷負山保塹歷有歲年敢扇梟風以張寇虐未馴聲
教迺十有五年春正月總戎三峰張君請於督府率
旅徂征申命誓師采入險阻斬獲六十餘人賊退守
諸巢分命偏裨乘夜夾攻批亢擣虛燔燒積聚聲震
林木賊迺奔竄悉稽顙面縛願紓殘喘以比編氓君
迺諭國德威解縛還俘諸酋感泣要質明神永為外
附于是籍其丁壯凡七千有奇分隸邑堡刊崖填谷
道里通行夏四月癸卯旋師藩臬諸大夫咸嘉君績

屬恩載筆記其事廼撰詩一篇詞義淺末不足揄揚
厥美聊續凱章云爾

有巢萃止于此叢棘晝伏宵鳴形也斯隱蠢茲苗民稔
于惡德亦共戴天爾心靡極厥心維何饕餮是宣黑齒
髮椎執弩張券登山遡嶺猿捷鳥旋掠我子女肆彼冥
頑黃源之西嘯聚淵藪積釁彌彰歷年滋久彼美將軍
志殲戎首率我征夫風神赳赳玄幕雲起素甲日輝爰
整輕銳授以成規稜威遐奮電發飈飛諸崑失據視險

如夷廼剪荆榛廼焚巢穴震懾蠻酋請纓羈紲皦日中
天矢言弗越進比諸華嶺外有截在昔孔明七縱與擒
庸蜀臣附寔惟攻心張侯舉職曰敬曰謹慎厥終始允
矣國琛

粵西詩載卷一

欽定四庫全書

粵西詩載卷二

桂林府通判汪森編

五言古

將遊湘水尋句溪

晉
謝朓

既從陵陽釣挂鱗
騷赤螭方尋桂水原
謁帝蒼山垂辰
哉且未會乘景弄清漪
瑟汨瀉長淀潺湲赴兩岐
輕蘋上靡靡雜石下離離
寒草分花映戲鮪
乘空移興以暮

秋月清霜落素枝魚鳥余方翫纓綫君自縻及茲暢懷
抱山川長若斯

酌修仁水賦詩

梁
范雲

三楓何習習五渡何悠悠且飲修仁水不挹背邪流
詠桂樹

南中有八樹繁華無四時不識風霜苦安知零落期

侍宴餞湘州刺史張續

庾肩吾

洞庭資善政層城送遠離九歌揚妙曲八桂動芳枝雨

足飛春殿雲峰入夏池郢路方遼遠
湘山轉蔽虧何當好風日極望長沙垂

南征

陳蘇子卿

一朝游桂水萬里別長安故鄉夢中近
邊愁酒上寬劍鋒但須利戎衣不畏單
南中地氣暖少婦莫愁寒

言離廣府還望桂林去留愴然自述贈懷

隋

釋玄達

標心之梵宇運想入仙洲嬰痼乖同好
沈情阻若抽葉

落乍難聚情離不可收何日乘杯至詳觀演去流

安輯嶺表事平罷歸

唐李嶠

雲端想京縣帝鄉如可見天涯望越臺海路幾悠哉六月飛鵬去三年瑞雉來境遙銅柱出山險石門開自我違瀍洛瞻途屢揮霍朝朝寒露多夜夜征衣薄白簡承朝憲朱方撫夷落既弘天覆廣且諭皇恩博皇恩溢外區憬俗詠來蘇正朔臣天子壇場拜老夫絳宮韜將略黃石寢兵符返旆收龍虎空營集鳥烏日落澄氛靄憑

高視衿帶東甌抗於越南斗臨吳會春色遶邊陲飛花
出荒外卉服紛如積長川思遊客風生丹桂晚雲起蒼
梧夕去舳艫清江歸軒趨紫陌衣裳會百蠻琛賁委重
闕不學金刀使空持寶劍還

始安秋日

宋之問

桂林風景異秋似洛陽春晚霽江天好分明愁殺人卷
雲山臕臕碎日水粼粼世業事黃老妙年孤隱淪歸歟
卧滄海何物貴吾身

下桂江縣黎壁

放溜觀前激連山分上千江回雲壁轉天小霧峰攢吼
沫跳急浪合流環峻灘敲雜出漩劃繚繞避渦盤舟子
怯桂水最云斯路難吾生抱忠信吟嘯自安閒旦別已
千歲夜愁勞萬端企予見夜月委曲破林巒潭曠竹烟
盡洲香橘露團豈傲夙所好對之與俱歡思君罷琴酌
泣此夜漫漫

桂林黃潭舜祠

虞帝巡百越相傳葬九疑精靈游此地祠樹日光輝
祭忽羣望丹青圖二妃神來獸率舞仙去鳳還飛日暝
山氣落江空潭靄微帝鄉三萬里乘彼白雲歸

入鬼門關

沈佺期

昔傳瘴江路今到鬼門關土地無人老流移幾客還自
從別京洛顏鬢與衰顏夕宿含沙裏晨行岡路間馬危
千仞谷舟險萬重灣問我投何地西南盡百蠻

巡按自離水南行

張九齡

理棹雖云遠飲水寧有惜況乃佳山川怡然傲潭石奇
峰岌前轉茂樹隈中積猿鳥聲自呼風泉氣相激目因
詭容逆心與清暉滌紛吾謬執簡行部將移檄即事聊
獨歡素懷豈兼適悠悠詠靡監庶以窮日夕

湘川新曲二首

杜易簡

昭潭深無底橘洲淺而浮本欲凌波去翻為目成留願
君稍弭楫無令賤妾羞

二八相招攜採菱渡前谿弱腕隨橈起纖腰向舸低自

解看花笑憎聞染竹啼

送任五之桂林

王昌齡

楚客醉孤舟越水將引棹山為兩鄉別月帶千里貌
譴同繒綸僻幽聞虎豹桂林寒色在苦節知所效

贈別元十八協律

韓愈

英英桂林伯實惟文武特遠勞從事賢來弔逐臣色南
裔多山海道里屢紆直風波無程期所憂動不測子行
誠艱難我去未窮極臨別且何言有淚不可拭

勢要情所重排斥則埃塵骨肉未免然又況四海人疑
疑桂林伯矯矯義勇身生平所未識待我逾交親遺我
數幅書繼以藥物珍藥物防瘴癘書勸養形神不知四
罪地豈有再起辰窮途致感激肝膽還輪囷

弔柳子厚

劉禹錫

元和乙未與故人柳子厚臨湘水為別柳浮舟適柳
州余登陸赴連州後五年余從故道出桂嶺至前別
處而君沒於南中因賦以弔

憶昨與故人湘江岸頭別我馬映林嘶君帆轉山滅馬
嘶循故道帆滅如流電千里江離春故人今不見

蠻子歌

蠻語鈎輈音蠻衣斑斕布熏狸掘沙鼠時節祖槃瓠忽
逢乘馬起恍若驚麕兔腰斧上高山竟行無舊路

送華陰尉張若赴邕府使幕

張即燕公之孫
頃坐事除名

昔忝南宮郎往來東觀頻嘗披燕公傳聳若窺三辰翊
聖崇國本保賢正朝倫高視緬今古清風夙無鄰蘭錡

照通衢一家十朱輪鄴國嗣侯絕為卿貴業貧夫子承
大名少年振芳塵青袍仙掌下矯首陵烟旻公治本非
罪潘郎一為民風霜苦搖落堅白無緇磷一旦逢良時
天光燭幽淪重為長裾客佐彼觀風臣分野窮禹畫人
烟過虞巡不言此行遠所樂相知新雨起巫山陽鳥鳴
湘水濱離筵出蒼莽別曲多悲辛今朝一杯酒明日千
里人從此孤舟去悠悠天海春

越亭二十韻

元晦

乏才叨八使，徇祿非三顧。南服頒詔條，東林證迷誤。未
聞述職效，偶脫囂煩趣。激水濬坳塘，緣崖敲磴步。西巖
煥朝旭，深壑囊宿霧。顥氣爽衣巾，涼颼輕杖屨。臨高神
慮寂，遠眺川原布。孤帆逗汀烟，翻鴉集江樹。獨探洞府
靜，恍若偓佺遇。一瞬契真宗，百年成妄故。孱顏石戶啓，
杳靄溪雲度。松籟韻宮商，鴛蕩勢翔遡。津梁危杓架，濟
物虛舟渡。環流馳羽觴，金英妬妝嫵。茄吟塞壘迥，鳥噪
空山暮。悵望麋鹿心，低徊車馬路。懸冠謝陶令，褫珮懷

疏傳遐想蛻纓綈徒慚卹襦袴福盈禍之倚權勝道所
惡何必栖禪關無言自冥悟

別鶴詞送令狐校書之桂府

楊巨源

海鶴一為別高程方窅然影搖江漢路思結瀟湘天皎
然仰白日真姿栖紫烟含情九霄際顧侶五雲前遐心
屬清渚淒響激朱絃招搖聞風雨迢遞各山川東南信
多美會合當有年鶴飛唳冥冥此意竟何傳

送公孫器自桂林歸蜀

楊衡

桂林淺復碧潺湲半露石將乘觸物舟暫駐飛空錫蜀
林異青眼蓬戶高朱戟風度香難尋雲飄詎留跡舊戶
閒花草馴鴿傍簷隙揮手共忘懷日墜千山夕

秋夜桂州宴送鄭十九侍御

秋至觸物愁况當離別筵短歌銷夜燭繁緒徧高絃桂
水舟始泛蘭堂榻詎懸一杯既離阻三歲奉周旋鴉噪
更漏寂露濡風景鮮斯須不共此且為更留連

桂州與陳羽念別

慘戚損志抱因君時解顏重歎今夕念復在幾夕間碧
桂水連海蒼梧雲滿山茫茫從此去何路入秦關

元巖

李渤

元巖麗南溪新泉發幽色巖泉孕靈秀雲烟紛崖壁斜
峰信天插竒洞固神闢窈窕去未窮環迴勢難極玉池
似無水玄井昏不測仙戶掩復開乳膏凝更滴丹砂有
遺址石徑無留跡南眺蒼梧雲北望洞庭客蕭條風烟
外爽朗形神寂若值浮丘翁從此謝塵役

送蕭綰之桂林

李羣玉

蘭江佩蘭人三弄蘭江春爾為蘭陵秀芳藻驚常倫
粲粲鳳池裔一毛今再新竹花不給口惟悴清湘濱
一朝南溟飛彩翮不可親蒼梧雲水晚離思空凝顰
我亦縱烟棹西浮彭蠡津丈夫未虎變落魄甘風塵
大禹惜寸陰況我無才身流光銷道路以此生嗟辛
萬里濶分袂相思杳難申桂水秋更碧寄書西上鱗

城南野居寄知己

曹鄴

奔走未到我在城如在村出門既無意豈如常閉門作
詩二十載闕下名不聞無人為開口君子獨有言身為
苦寒士一笑亦感恩殷勤中途上勿使車無輪

龍隱巖

宋

李師中

春波飽微綠斗柄涵虛明方舟貫巖腹鷺鸕相酬鳴仰
窺穹窿頂宛轉百怪呈僅餘鱗甲碎不見頭角獍下闔
清泠淵演迤萬頃澄但同魚鳥參勿遣蛟龍驚挾苔撫
竒篆倚棹看題名三將標殊勛自與山不傾誰歟贅小

葉政恐山靈嗔南洞更幽絕仙佛依崢嶸太虛可為室
豈復資藥楹乳泉助茗枕中有冰雪清何須驂鸞去此
即白玉京鼎來不速客抱琴忽逢迎愛此無絃曲巖溜
同一聲為君洗塵耳喚我詩魂醒祇恐白衣至好句亡
由成

南獠詩

歐陽修

洪宋區夏廣恢張際四維狂孽久不聳民物含春熙者
稚適所尚游泳光華時遽然攝提歲南獠掠邊陲余因

叩村叟此事曷如斯初似却人問未語先涕垂收涕謝
客問為客陳始基撫水有上源水淺山嶮巖生民三千
室聚此天一涯狠勇復輕脫性若鹿與麋男夫不耕鑿
刀兵動相隨宜融兩境上殺人取其貲因斯赳赳來此
寇易為羈鼠竊及蟻聚近裏焉敢窺勢亦不久住官軍
來即馳景德祥符後時移事亦移四輔哲且善天子仁
又慈將軍稱招安兵非羽林兒龍江一牧拙邏騎材亦
非威惠不兼深徒以官力欺智略仍復短從此難羈縻

引兵卸甲嶺部陳自參差鋒鏑殊未接士卒心先離奔

走六吏死

初在懷遠軍卸甲嶺殺傷范禮賓王崇班等六人落陣死

明知國挫威自

茲賊聲震直冠融州涪縣宇及民廬燬蕩無孑遺利鏃

淬諸毒中膚無藥醫長刀斷人股橫屍滿通達婦人及

孳產驅負足始歸堂堂過城戍何人敢正窺外計削秦

疏一一聞宸闈赫爾天斯怒選將興王師精兵二萬餘

猛毅如虎貌劒戟凜秋霜旌榮閃朝曦八營與七萃豈

得多於茲外統三路進小敵胡能為前驅已壓境後軍

猶未知逶迤至蠻域但見空稻畦搜羅一月餘不戰師

自罷荷戈莫言苦負粮深可悲哀哉都督郵無辜遭屠

糜

昭州都曹皇甫僅三人部粮入洞遭蠻賊掩殺及害夫力千餘

咤咋計不出還出招

安辭半降半來拒蠻意猶狐疑厚以繒錦贈狙心詐為
卑戎帳草草起賊戈躡背揮我聆老叟言不覺顰雙眉
吮毫兼疊簡占作南獠詩願值采詩官一敷于彤墀

送門人歐陽闢還桂林

梅聖俞

客心如萌芽忽與春風動又隨落花飛去作西江夢我

家無梧桐安可久留鳳凰巢在桂林鳴哺不得共無忘
桂林榮舉酒一以送

藤州江下夜起對月贈邵道士

蘇軾

江月照我心江水洗我肝端如徑寸珠墮此白玉盤我
心本如此月滿江不湍起舞者誰與莫作三人看嶠南
瘴癘地有此江月寒乃知天壤間何人不清安牀頭有
白酒盎若白露漙獨醉還獨醒夜氣清漫漫仍呼邵道
士取琴月下彈相將乘一葉夜下蒼梧灘

雙松堂

黃庭堅

文殊堂下松永日如鳴琴我登雙松堂時步雙松陰中
有寂寞人安禪無古今

獨秀山讀書巖

沈晦

老鶴下遼天昂昂在林表霜毛臨野人逸氣秋天香矯
矯顏始安不受冠帶繞清真自嵇阮一醉萬事了讀書
空谷中生芻白駒皎神仙問崕岓弓彎天宇小豈無素
心人幽睡共清曉佻達在城闕鐘磬出林杪試令栽桃

李照海春嫋嫋長哦五君咏極目送飛鳥

聞彥和過桂州

鄒浩

削迹投炎荒有吏督其後一州一易之稍緩輒訾詬所
歷多官僚豈無親且舊前車覆未遙不敢略回脰誰謂
桂嶺僧於君獨勤厚沐浴君髮膚澣濯君領袖使君霜
栢姿凜凜出塵霧真風絕顧瞻高義激頽仆乃知世外
情非復世間構嗚呼君何憂時命不終繆

飲桂州酒示柄

好酒如好人雖久略不變炎涼互推移氣味愈可見豈
若茅柴漿多為衆所賤舉杯吾得師足以警閒燕

仙宮嶺

曉雲生嶺端遮日成清陰炎氛遽辟易興逸安能禁仙
宮風塵表高高百千尋石路上曲折健足猶難任綽約
兩仙子雙鬟坐沉吟巫覡意何許門窓藤蔓深樵叟向
我言自古傳至今去州五十里有峒鬱森森陶家李家
女年各勝巾衿恍惚若逢遇相與登崎嶇一朝作蟬蛻

英魂不墜沉鄉人共祠之彷彿來顧歆水旱禱輒應民
吏同所欽此宮乃行宮春秋薦誠謚言已叟仙去四望
祛煩襟榮山直南聳龍嶽山朝壬越王連佛子密山秀
孤岑回環萬峰巒插雲皆玉簪滔滔兩川流會合通梧
潯漁舟糝木葉城郭幾突黔虛徐韻長松飛鳴集珍禽
須臾烟靄青遐邇浮祲祲變化紛見聞飲酒時一斟我
罪貸五鼎我軀重千金雖居瘴癘鄉肯使瘴癘侵囊衣
完舊裾匣劍存新鐔氣聽謝耳力誰到無絃琴子期久

冥漠天地為知音中和王度新祈招詠惜惜賜環諒匪
朝聊以寫我心

別昭州

江山本無情別去亦何語向來爽氣中食息三月許來
非吾所求去非吾所禦回首謝江山吾今若輕舉

題勾漏洞

李綱

抱病卧雲海夙夕負深恐寬恩聽旋歸何啻丘嶽重問
津勾漏洞散策寶圭洞羣峰羅翠屏環合無缺空石盤

與丹竈遺迹可捫弄仙游感初心幽賞協清夢却來窺
宸章寶氣橫蟠螭真行雜草隸筆勢極翔動大小飛白
書飄灑縈舞鳳共惟睿知姿多能本天縱妙蹟藏名山
俾與萬世共林巒增炳煥神物各護擁惜無深巖屋蔭
覆示崇奉何當鳩良材為葺傾壓棟妖氛不指狼中原
戎馬闕九廟未奠居臣子咸憤痛豈知炎荒中奎畫得
瞻諷至哉博大言粟麥固異種天帝及諸佛百神共妙
供竊於翰藻間窺見神心用源流此中來基岑自興宋

稽首歸琅函斐然成善頌

題容州學育材堂

治世崇儒術膠庠萬宇臨自從馳羽檄誰復念青衿賢
守來南紀宏規肇泮林飛輦開講席鼓篋拂書蟬採藻
繡江水撫絃都嶠岑潛消戎馬氣有懷飛鶚音洙泗道
非遠朱張賢至今大器在東序追琢且南金常袞闕風
變文翁蜀化深願來遊學者仰副育材心

屏風巖

張孝祥

高崖劃天開仄徑通乳穴隈堆青螺髻嵴嶺白玉闕外
有虎豹蹲中恐蛟蜃蟄東縈俯雷電西出挾日月萬壑
來悲風六月不知熱但覺駭心目未易記筆舌平生山
水趣嶺海最奇絕洞府二十四未厭屐齒折晚乃游此
崑餘地比僕妾同來六七士嗜好頗相埒舉酒酌山神
慰汝久湮滅

贈臨桂石判官安民

北城石先生欲喚不敢頻坐上欠此客長懷渺無津南

方鳳之徒瑞世五色文

送林謙之司業出為桂路提刑

楊萬里

兩眼起宵坐搔首偶不欣孤念元無感懷我同社人昨
日林先生抱經出成均初聞為渠喜忽悟誰我親緬然
記宿昔夜款水際門微月耿耿寂幽蛩慨涼新論詩煮
豆粥粥熟天已晨先生補天手萬象焉能春若非千載
仰却要今世珍望門舊傳業不在先生身雪前何有松
燬中諒非碻論思尺有咫法去曾逡巡誰言我無耳老

矣未有聞先生又舍我離別尚足云桂山玉筍立桂水
羅帶紋得句能寄似不須持嶺雲

壽邕州趙守

崔與之

大廈開朱明物態豐且碩薰絃發新奏生意轉無極間
氣清而和融結賦有德碧梧挺幽榦曠度漫九澤富哉
學古育仁義供服食渾樸希世珍外溫而內直驂騶開
道路聲光日斯赫九關通籍初南來墜雙鳥片心清徹
底杯水餞泥軾京兆入幕賓去天不盈尺佳最入聰鑢

行行陟文石邕為五管雄地控西南域專閫難其人弄
印無以易袖却經綸手天邊樹牙戟猩獠叢篁中深棲
而屏息夜月照銅柱警囊聲寂寂邊人解帶卧危地成
樂國屏風御墨鮮早晚來召驛媿我樸樾才潦霧甘遠
役題坐遇知己孤根費培植崧高生申甫好語誼并陌
碧油塞雲端阻莫陪賀客歌詠淇澳詩清修如圭璧他
年玉班頭蒼髯而赤黻

冰井

任詔

驅車出東門弭節訪水井寺古棟宇傾碑折苔蘚屏源
泉池中生瑩淨可鑑影命僧旋汲之入口勝霜冷試烹
白雲茶碗面雪花映清泠滌煩襟潤澤勞鉅綆可以濯
我纓悠然脫塵境

送甘甥可大從定叟弟之桂林 張 栻

季也有行役我思獨悠悠親朋非不多子能從之遊挂
席上湘水青山挾行舟藍輿問嶺路政爾荔子秋人言
桂林好頗復類中州近郊多勝概雉堞冠層樓待渠幕

府暇時與同冥搜吾子有令姿胷中富九流處世多齟齬但當付滄洲超然擴遐思詎可耳目謀願為百鍊剛莫作繞指柔昔人不吾欺子盍試反求預想他年歸此地復綢繆刮目看二子一笑紓百憂

七月旦日晚登湘南樓

文書稍去眼日夕進微涼高樓一徙倚清風為我長漁父蔭深樾歸人度浮梁仰看河漢明俯視羣山蒼平生會心處於此故難忘舊聞水東勝巖巒發天藏豈無一

日暇勇往聊徜徉民瘼未渠補况敢懷樂康天邊雲物
佳似復為雨祥秋成倘可期歲晚或自強當從農家鼓
一歷水雲鄉

望後一日與客自水鄉登湘南月色佳甚翌日用
鄉字韻簡游誠之

一雨五日餘南州三伏涼喚客近方沼笑談引杯長相
將復登樓月色在屋梁念我懷百憂忽忽髮變蒼及此
少自舒觴詠未可忘孤光凜下照景妙無留藏沙邊數

白鷺欲下仍翔翔羣動亦自得如我四體康平生子游
子虛白生吉祥官舍並樓居登臨筋力強未可效王粲

居然思故鄉

誠之所居正在樓旁自
中夏以來每攜書獨登

八月既望要詳刑護漕游水東早飯碧虛徧觀樓
霞程曾龍隱諸巖晚酌松關放舟過水月洞月

色佳甚逼夜分乃歸賦此紀遊

離江即湘江濺濺清見石其東列羣峰秋色碧復碧日
出霧露收草徑上逼側憑欄揩望眼已足慰疇昔更窺

崑穴勝創見為驚惕如何數里間奇觀相接迹寬同厦
屋深劃若巨靈擘日月遞光景風雲變朝夕石橋幾年
成乳竇時一滴神龍舊隱處仰視多辟易蛻迹凜猶存
隱隱印霜脊下有澄湫深餘波漱蒼壁往者已仙去來
者此其宅薄晚扣松闕風過聲索索聊麾車騎退容我
且散策却望訾家洲輕舫度前磧回首烟樹林已復挂
蟾魄宇曠淨餘滓羣物被光澤河洲寄遐思空巖皎虛
白清輝可一規水色相激射天邊與川上亭亭如合璧

居然廣寒游不用假六翮班坐依微瀾晤賞共佳客因
之想千載詎有今古隔簫鼓歸夜闌觀者聚城陌往往
羅杯拌班班見般核諒因年歲豐人意少舒適視爾意
少舒於予亦忻懌

清明後七日與客同為水東之游翌朝賦此

平生山水癖妙處只自知夙約常寡味邂逅愜心期幅
巾與藜杖安步隨所之竭來坐官府頗覺此願違城頭
望羣峰欲往類絆羈三春苦風雨晴日一伸眉沙邊散

車騎竹輿從嘔呶獨與三四客野服相追隨亭高俯空
曠洞古探瓌奇懸崖隱日月幽壑蟠蛟螭澗水雜鳴佩
松風發清吹興來即傾酒語到亦論詩聊措簿書眼賞
此閒暇時所歷固未厭所感多餘思昔遊木葉下今茲
綠陰肥江山雖可識歲月迺如馳素餐豈不念懷安敢
云私歸來耿不寐敲枕聽晨雞

題榕溪閣

寒溪澹容與老木枝相樛其誰合二美名此景物幽太

史昔南驚於焉曾少休想當下榻初清與耳目謀品題
得要領亦有翰墨留我來訪遺址密竹鳴鈞輒稍令舊
觀復還與佳客遊樹影散香篆水光泛茶甌市聲不到
耳永日風颼颼所忻簿書隙有此足夷猶平生丘壑願
如痼不可瘳雖知等喧寂終覺靜理優更思濯滄浪榕
根浮小舟

靜江歸舟中讀書

南風駕小雨羣山淨如沐吾歸及新涼所歷慰心目軋

軋柔櫓鳴卧見山起伏推枕意悠然還取我書讀平生
領解處於焉更二復老矣百念疎但欲斯境熟向來五
嶺游日力半吏牘小心了官事終覺媿惇獨世路自險
夷人情費追逐翩翩孤飛翼息蔭望林麓

張子真楊政光吳德夫追路湘源賦此以別

驅車出嚴闕觸熱歸路長一雨羣物蘇吾行亦清涼灑
水自南去湘流正洋洋眷言二三友跋馬勤送將蕭然
短長亭每語夜未央張子名家駒千里方騰驤楊郎嶺

中彥而能斂鋒銚延陵舊所熟氣味固難忘向來幕府
遊三秀麗齋房居然出別語分袂楚粵鄉人生會有別
勿悲參與商獨有贈言意臨歧更平章風俗易移人宦
途劇羊腸千鈞有不守決去飛鳥翔要當勉自持詩書
作金湯他年相會處刮目看增光為謝桂父老無澤留
一方惟餘石間字時與洗苔蒼

送端臣桂林先生兼簡信叔帥座朱芾

駉駉碧玉林琢句白瓊瑤人間埃壒盡星羅數分毫程

公列仙長磊落粹露曠玉厯發太和泓君同逍遙刻巖
栖烏鴉陟巘透紫霄南風毋賦鵬即是宣室招

次韻南軒先生榕溪閣

閩山谷
所名

吳 儆

紹聖用事臣黨與紛相膠當代幾忠良一朝咸黜幽太
史坐直筆愈黜名愈休消長關否泰天意匪人謀累臣
誰司城獨為景物留當時西復南萬里不停輶誰知百
年定欲起九京遊積莽新陳迹寒泉薦永甌想當千騎
臨水木寒蕭颼我公今伊傳茲焉少夷猶炎方凋瘵餘

公來今已瘳榕溪兩甘棠千載誰劣優太史後凋松公
如巨川舟

粵西詩載卷二

欽定四庫全書

粵西詩載卷三

桂林府通判汪森編

五言古

八桂堂

孫觀

橘中隱商顏桑下陰羽葆古人日已遠遺跡今未掃
英八桂林屹立表衆草名隨五柳傳壽待三松倒南堂
駐金節仗劍收蠻獠駢駢立萬馬獵獵卷千纛元戎領

客來小摘羞澗藻醉顚亂繁葩移來插晴昊

七星巖

十載汙修門簪橐侍帝垣五雲深莫窺衆星拱以繁一
坐牘背書身落海上村山川發餘想鐘鼓眩昔聞星圖
煥斗極兩兩錯地文今日復何日乘槎造天閭日月起
可挾參井立能捫誰當揭其柄為我酌瀛尊

棲霞洞

飛仙巢三山弱水環四溟誰知黃茅嶺自有白玉京獨

曳一枝筇枝空上青冥蟾飛墮八桂石隕化七星幽幽
炬火然異狀不可名垂天紫雲蓋插地翠羽屏已無俗
士駕尚有遷客經敢言居夷陋妙絕冠平生

來風亭

萬樹張火傘千嶂卧燭龍彤雲竟天起光墜九日紅投
老落蠻嶠暘死愁吳儂風流貴公子一笑林下逢蒼崕
拆天罅中有萬里風習習駕兩腋飄飄落瓊宮草木嘯
竽籟澗谷酣笙鏞披我快哉襟誰能辨雌雄

龍隱巖

跳波觸石喧古木抱崖擁老蛟厭泥蟠一笑作潭洞孤
峰起嶮崿哀壑浩呼洶腥風噤哇淫凍雨落毛飀凜凜
白晝寒瘴髮立盡聳旱氣曛日黃縮爪但陰拱悠然四
大海歛此一毛孔安得化為霖蕙葉有光寵

曾公巖

羣峰依天立萬馬屹不動風歌紫玉珂雨暗青絲鞵相
君千里目渺渺孤鴻送披雲覩天巧鑿翠出巖洞中空

貫長虹側立剖大甕宛宛臥石梁欲起時地控玉棺已
上天甘棠有遺誦獨餘澗底泉時與幽人共

西山超然亭

龐區翳榛莽地瘴藏百怪西山何軒軒拔脚風塵外中
縈一線蟠側立兩壁對旁連九疑高遠控三湘大孤亭
坐林杪俯見飛鳥背號弓泣二女禦魅竄四罪誰云窘
囚拘故自脫天械飄飄思凌雲萬里風雨會

礪巖寺

千松夾道直一水抱村流清絕小叢林繞舍竹脩脩老
僧慣見客壞衲雪滿頭野果拆奇苞畦蔬剪新柔漂零
五管去邂逅一笑留詩成寫君壁記此夢中游

虞氏隱居雷守虞沆避地桂林結茅江上萬山環
立二水交流游客過其下皆有忘歸興卜鄰之
意一首

山色洗眼青遙見紫翠重江光照肌白磧作冰雪容問
誰三間茅散我九節筇江聲過席上山影落杯中主人

樂忘歸臥聽鼓角雄點檢屐齒痕爛斑尚苔封寂寂春
蘿月蕭蕭秋桂風何日賦歸來庭柯撫孤松

飲修仁茶

烟雲吐長崖風雨暗古縣竹輿賴兩肩弛擔息微倦茗
飲初一嘗老父有芹獻幽姿絕媚嫵著齒得瞑眩昏昏
嗜睡翁喚起風洒面亦有不平心盡從毛孔散

題象守坐嘯堂

治國如烹鮮馭民如牧羊薰狐廬自焚投鼠器必傷曹

侯百世師獄市寄全齊天下本無事庸人勿擾之危機
蹈潛弩惡吏冠虢虎飛走豈不高搖足墮網罟使君古
太丘妙割無全牛班春千騎曉長嘯萬壑秋棠陰日轉
午風簷翠蛟舞問道舍蓋公誦詩選何武渭水占熊羆
萬里答羌夷試磨南山石更草中興碑

別象州陳守容德

三年客殊方榮悴不堪說迢迢家萬里奄奄命一髮使
君古丈夫興衰在縲紲平生風馬牛舊職比鵜屬欣然

一笑粲破此百憂結皇恩下天扉
淚泣孤臣血行厨洗玉盤載酒
助歡悅庖珍問五鯖餅字炊十裂
徙突今未黔班草尺一訣何須更
秉燭端是夢中別

發桂林劉帥立道同諸司出餞於甘棠渡口二首
行盡海北天笑指湘南路使君載
酒醪擁節東城駐前驅千纛直縱
獵萬人呼塵流翳白日十里映黃
霧何人檝迎我一葦橫江渡渺渺
倦鴉翻相隨歸薄暮

洶洶號萬竅颼風吹海渾冥冥蔽
一天瘴雲埋日昏南

荒底日所黃葦三家村誰云花解笑但有鳥能言謬恩
解南冠歸路首北轅酒行可以起稚子候柴門

清湘縣郊外雜花盛開有懷石湖 范成大

午行清湘縣妍煖春事嘉柴荆鬧桃李冥冥一川花故
園豈少此愈此百倍加我寧不念歸顧作失木鴉百年
北窓涼安用天一涯君恩重喬嶽敢計征路賒鄉心與
官身鑿枘方聳牙橘柚走珍貢何如繫匏瓜明當復露
奏天日臨幽遐儻許清江使曳尾還汙邪

全守支耀卿飲餞七里倅楊仲宣復攜具至深溪
酌別且乞余書走筆作此兼寄耀卿

店舍烟火寒塵沙亭堠遠
嫣紅糝芸綠春事亦已晚年
芳去踈踈江水來袞袞
故人瀟湘逢留落一笑莞已張
七里飲更出深溪餞
草間艷紅粉竹裏趣厨傳
故意如許長由來共鄉縣
愧我不能觴負此離歌
囀別愁滿天末不醉
何由遣却憶支使君
風前白波捲

次韻陳仲思經屬西峰觀雪

仙人灘江遊剪水馮夷宮賓友來鄒枚寒轡搖冬瓏起
望天南陸王沙滿長風越人來省識把酒酌層空從來
嶠南北人謂將無同那知梁園霰飛入瑞露中幕府有
清士尋僧上西峰六花信娟巧未及五字工我亦滌冰
硯課虛貴新功莫嗤兩臞儒毫端尚清豐

六月十五日夜汎西湖風月溫麗

暮樣金龜潭追隨今夕涼波紋挾月影搖蕩舞船窓夜
久西山高松桂黯以蒼長烟界巖腹浮空餘劒鋸棹夫

三弄笛跳魚翻素光我亦醉夢驚解纓濯滄浪多情笑
葉風嫋嫋吹鬢霜會心有奇賞天涯此何方清潤不生
塵空明滿坐香過清難久留俛仰墮渺茫

興安乳洞有上中下三巖妙絕南州率同僚餞別
者二十一人遊之

山水敦夙好烟霞痼奇懷向聞乳洞勝出嶺更徘徊雪
林縞萬李東風知我來華裾繡高原故人紛後陪繫馬
玉溪橋嵌根豁崔嵬蕩蕩碧瑤宮冰泉漱牆隈芝田溉

石液深畦龍所開，勾我一掬慳。類此炎州埃，仍呼輪袍舞。
醉倒瑞露杯，但恐驚山靈。腰鼓轟春雷，薪翁雜餉婦。
園視歡以吟，茲巖何時鑿。閱世幾劫灰，始有此客狂。後
會真悠哉，南遊冠平生。已去首猶回，歲月可無紀。三洞
俱磨摧，會有好事者，摩挲讀蒼苔。

鐮觚

在興安縣五里所，秦史祿所作也。迎海陽水壘石為壇，前銳如鐮，衝水分南北，下為湘灘。

二江功用奇偉，余交代李德遠嘗修之。

導江自海陽至縣，迺彌迤狂瀾，既奔傾中流，遇鐮觚分。

為兩道開南灘北湘水至今舟楫利楚粵徑萬里人謀
斂天造史祿所經始無謂秦無人虎鼠用否耳紫藤纏
老蒼白石溜清泚是間可作社牲酒百世紀修廢者誰
歟配以臨川李

初發桂林有出嶺之喜但病餘便覺登頓至靈川
疲甚自歎羸軀乃無一可偶融州有使來書此
寄之

桂林獨宜人無瘴古所傳北客守炎官恃此以泰然堂

高恆宴坐訟簡容佳眠不計身落南瘡柄三回天今朝
遂出嶺歡呼繫行纏置兔脫豐草池魚躍清淵那知多
病身久靜翻懷安長風蕩籃輦簾箔飄以翔靈泉路竭
蹶僕夫告頰肩我亦頭岑岑中若磨蟻旋走投破驛宿
強飯不下咽茲事未渠央萬里蜀道難十年故倦游况
乃成華顛蠶老當作繭不繭夫何言

陳仲思陳席珍李靜翁周直夫鄭夢授追路過大
通相送至羅江分袂留詩為別

相送不見別更行一程路情知不可留猶勝輕別去二
陳拱連壁仙李瑚璉具周子雋拔俗鄭子秀風度嗟我
與五君曩如栖鳥聚偶投一林宿漂搖共風雨明發各
飛散後會渺何處栖鳥固無情我輩豈漫與班荆一炊
頃聽此昆弟語把酒不能觴有淚若兒女修程各著鞭
慷慨中夜舞功名在公等癯儒老農圃

初入湖湘懷南州諸官

今朝入湖南甘土絳以紫厥壤既殊異風氣當稱此回

思始安城舊籍贅楚尾實惟荊州隸零陵之南鄙時雪
度嚴關物色號清美儻以土宜觀尚非清相比何況引
而南焦茅數千里向我作牧時客過不停軌憧憧走官
下既至輒咎悔書來無別語但說瘴鄉鬼我今幸北轅
又念衆君子懷哉千金軀博此五斗米作詩諷方來南
遊可以已車輪倘無角吾詩亦金柅

玉華洞

戴復古

憶昨遊桂林巖洞甲天下奇奇怪怪生妙不可模寫玉

華東西巖具體而微者神功巧穿鑿石壁生孔罅玲瓏
透風月宜冬復宜夏中有補陀仙坐斷此瀟灑空山茅
葦區無地可稅駕舉目忽此逢心駭見希咤題詩愧不
能行人亦無暇

送來賓宰

君作來賓宰聽我說來賓蠻俗無王化當為行化人有
民無租賦租賦出商旅逐利遭重徵商旅亦良苦能放
一分寬可減十分怨不愛資囊橐但愛了吏遣民窮賴

撫摩官貧俸不多但得百姓安俸薄其奈何勿謂朝廷
遠官職易遷轉律已貴廉勤御事要明斷自縣辟為州
指日為太守須知早歸來瘴鄉不可久

留守參政大資范公余同年進士往歲帥桂林題
刻最多四方傳之暇日嘗與同寮徧觀因即公
所名壺天觀題數語

宣政喜邊功隆兌築州縣程公自名巖刻石記所建得
既不償費中興棄不繕誕謾磨崖辭當日妄誇銜英英

石湖仙改作壺天觀壁間三大字莊重如我弁詩文鸞
鶴音筆勢龍蛇變登高瞰洞戶離水澄如練勝概聳靈
臺遐觀起三歎玲瓏二十四妙墨鐫題徧我來為拂塵
端若侍顏面邦人頌遺愛壽骨癯且健今坐玉麟堂安
得使之見

發湘源驛寄府公

劉克莊

走本山中人感激趨燕臺謬辱弓旌招愧乏謀議陪先
生如春風盎然噓陳芳曉入開玉帳夕話扁鈴齋下榻

驚一府捫杖窮千崖豈曰君畜伋實惟子視回歲晚謀
北轅淒其難為懷欲言先莞結既決猶徘徊是日戒行
李送者皆鄉枚兵厨遣珍餉祖席羅寶釵下令許卜夜
寧畏街鼓催詰旦枉茸纛山亭陳金壘都人如堵牆謂
我何榮哉未聞從事去親致元戎來繾綣談至夜霜月
照露苔長跪抱馬足離緒焉能裁麗譙落天杪悵望空
倚桅昔人死知己骨朽名不埋公有管樂姿愚非溫石
才他時倘後彫安敢忘栽培

上已與二客遊水月洞分韻得事字

勝蹟造物慳貧交世情棄昔戒十客來且無一人至惟
余暨兩君鼎足坐水次歡言天氣佳誰謂風土異高吟
離騷選序酌建髻穉滌厓去惡詩捫石認缺字古來幾
禊飲傳者纔一二蘭亭感慨多未了生死事杜陵更酸
辛窮眼眩珠翠旨哉茲日遊超然遺塵累逍遙千載後
尚有浴沂意巖扉滑如玉歲月可鐫識

程公巖

石室外甚狹中廣如毬場偉麗若天造軒豁無棟梁嚴冬既深燠盛夏尤虛涼偶至不忍去杖屨猶方羊人能專此壑何必政事堂先須置禪龕次第營丹房烟霞入几席塵土麾門牆學道縱未得著書亦可藏

辰山

一峰疊三洞乃似弘景樓下洞初俯入鮮室寒颼颼中洞忽躍出有逕通玄幽豁然崖谷判萬態誰鐫鏤或如整冠帶或如綴珠旒或如鯢鯨飛或如龍麟游石橋狀

天台木筏疑蜀州稍憩大士巖遂經羽人丘力窮至上
洞身載雲氣浮未畢山水緣勉為塵世留平生避地心
茲焉宜菟裘長斧樵青嶂短蓑耘綠疇獨恨汲路遠溪
澗皆背流會當逢異人卓錫成靈湫

曾公巖

廣室內嵌空層峯外魏鬼仰視駭懸石俯踐愁滑苔古
竇風肅肅陰澗泉洄洄飛梁跨其間上可陳樽壘愛涼
復畏濕當暑重裘來名巖者誰歟兄固弟子開憶昔建

中初國論幾一迴惜也祖荆施卒為清議排至今出牧
地姓字留蒼崖躊躇增慨歎日日禽聲哀

秋日桂州遠華館呈胡仲威

嶺表豈必熱庚伏頻滂沱薄暮辱招要盆李參瓶荷君
侯如長松折節交藤蘿奇字識夏鼎古音彈雲和今日
素商至高齋涼意多夜清羣籟息已有蛩鳴莎人生不
飲酒賢愚同銷磨拍手問相累獨醒欲如何謬承青眼
顧詎惜蒼顏酡客散我亦歸耿耿看斜河

伏波巖

懸崖萬仞餘江流繞其趾仰視不見天森秀拔地起中
洞既深豁旁竇皆奇詭惜哉題識多蒼玉半鑱毀安得
巨靈鑿永削崖谷恥緬懷兩伏波往事可追紀銅柱戍
浪泊樓船下湟水時異非一朝地去亦萬里山頭博德
廟今為文淵矣謂予詩弗信君請訂諸史

戴秀巖

茲巖視諸峯厥狀尤崢嶸舊為碧蘚封新有朱棧橫縻

腰尚恐墜束炬方可行外狹中乃寬始闇俄忽明仰窺
神魄悸俯顧形殼輕遂覽丹爐基微聞玉鼓聲源深足
力盡路黑雲氣生不辨晝夜分恍疑世代更嘗聞學神
仙所得由專精豈吾諸名士羨彼一老兵欣然約同志
嗣此將尋盟安知無白鹿絕頂來相迎

中秋湘南樓餞張昭州

臺使選良牧詔下帝曰俞高牙植華艦餞者來傾郭明
月滿麗譙寒光映尊壺桂人願少留昭人望疾驅一室

可為政況乃有國都嶺民日以耗丁口強半無洋洋紫
雲詔侯其勒座隅道鄉游息處暇日披榛蕪鄙拙添投
分臨風獨踟躕頗念友離索寧論鬼抑掄何由叩鈴閣
百榼傾兵厨

癸水亭觀荷花

執熱屏人事偃卧慵巾裳過門二三友失喜跣下床鳴
騶出華陌聯轡遵野塘崇軒俯萬荷濯濯涵波光都忘
瘴海中疑墮玉井傍遠無膏粉氣近有水霜涼製葉可

以衣采韻可以嘗離騷譜靈草品爾列衆芳似曾識三
閭安肯肖六郎詞人更儼薄比詠猶妃嬙曷不觀茲華
意色和而莊風吹月露洗豈若冶與倡衆方慕絕艷誰
能參微香余詩縱枯淡一掃時世粧

棲霞洞

往聞耆老言茲洞深無際閭中或識路塵外別有世幾
思絕人事齋糧窮所詣棋終出易迷炬絕入難繼孤亭
渺雲端于焉小休憩憑高眺城闕擾擾如聚蚋盡捐滓

穢念遂有飛舉勢山靈媚清遊雨意來極銳濛濛濕莎
草浥浥涼松桂暝色不可留悵望巖扉閉

三月十四日陪帥卿出遊

未出堯山雲既出雲徐開君侯與天通造化力可回駕
言訪巖扉羣彥森追陪旗鉞映川原笳吹喧蒿萊掃石
生夷曠捫葛上崔嵬訾洲久蕪沒草樹皆新培范張數
君子遺刻蒼蘚埋方羊不忍去返照明千崖沙禽就栖
宿綠鷗猶汨洄眷焉宇宙間此樂何常哉鄴都會應劉

梁園命鄉牧主公富貴人襟抱尤雄瑰當年篇翰存往
往鄰俳諧英英大都督羔鴈招遺才雲烟生妙筆冰雪
懸靈臺况復今夕霽素魄海上來一碧九萬里空洞無
纖埃臨風惜飲量孤負黃金壘座中盡文豪授簡奚徘
徊吾詩固拙速聊為石生媒

荔枝巖

異境閔神奇一罇通深阻呀然張蟾吻光怪腹中貯始
來尚覲面稍進但聆語迴頭失塵氛東緼行里所石房

容十客石柱徑丈許眠藝若將吠墜果疑可咀平生聞
化城今見玉樓櫓陟高既趨捷循狹或偃僂忽逢路窮
處淺浪隔洲渚心知仙聖居欲到無飛羽向非薪燭力
往返何異瞽重游倘未卜聊向詩中覩

龍隱洞

先賢評桂山推爾居第一豁然碧瑤戶夾以雙玉壁中
有無底淵墨浪常蕩滴諒當剖判初倍費造化力雷噴
斧山開龍怒裂石出至今絕頂上千丈留尾脊寧論兒

女子壯夫股為慄我來欲題名腕弱墨不食摩挐狄李
碑文字尚簡質今人未知貴後代加寶惜泐流上駭舟
久游覺蕭瑟巖室寬如家迴樞聊惴息

狄武襄公平蠻
碑李師中待制

宋頌
在焉

琴潭

山形若覆盃潭面如拭鏡奇哉几案物千古弃荒賈了
無攀躋勞坐愜幽壑性泉源黑難窮崖色碧相映闔深
畏龍蟄窺淺見魚泳可憐風水聲空山誰來聽我欲買

茲丘掃迹逃囂競未言葺茆齋先可理漁艇

五月二十七日遊諸洞

來南百慮拙所得惟幽尋矧余玉雪友共此丘壑心江
亭俯虛曠酉室窮邃深是時薄雨收白靄籠青岑棄筇
追野步却扇開風襟炎方豈必好差遠輦鼓音且願海
道清莫問神州沉徘徊惜景短留滯畏老侵昨遊感鶯
哢今至聞蟬吟常恐官事縈佳日仍登臨譬如逃學兒
汲汲貪寸陰何因釋膠擾把臂偕入林

泛西湖

桂湖亦在西豈減潁與杭
丹橋抗崇榭淥波浮輕航
休沐陪勝餞軒蓋何煒煌
停橈藕花中一目千紅裳
詎知白晝永但覺朱夏涼
古洞半蕪廢仙人今在亡
踞石散醉髮吸澗澆吟腸
延綠繚溪步詰曲經禪房
野鳥啼密竹高蟬噪疎楊
雖無絲管樂談論諧宮商
諸君敏于詩援筆如飛翔
顧予乏華藻山鷄追鸞皇
頗能讀古碑所恨侵夕陽
明發復擾擾前游未可忘

慈氏閣

建閣五季時丹碧見層累吾行半區中鉅麗莫與比想
方營綜時伯心極雄侈但思窮耳目寧論竭膏髓一朝
陵谷變飛電掃僭壘相波日夜流不洗爭篡恥惟存浮
屠居願力久未毀夕陽弔陳跡危檻聊徙倚遙憐下界
熱高處涼如水若非逼嚴鑰坐待鐘聲起

書堂山

子厚文章宗仲塗豈後身不肯作崑體寧來牧湘濱誅

茅翠麓顛日與書卷親刻去五季哀挽回六籍醇歐尹
相繼出孤唱由伊人風流喟已遠尚喜棟宇新千峰高
叢叢一江碧粼粼禽魚暨草樹纖悉几案陳澗泉既可
汲山木亦可薪熟讀壁間藏痛掃毫端塵晶哉山中友
勿厭泉石貧

佛子巖

環郭洞府多所患在卑濕斯巖獨虛敞他境未易及穹
如層屋構廣可百客集開竇送雲出掃壑延月入穴居

倘堪謀徑欲老樵汲絕顛猶玲瓏苔磴不計級惜為僧
所浣飛棟緣業岌佞佛墮痴相明鬼趨陋習遂令登眺
者欲往足若繫何當一燎空盡見萬仞立

風宅

風于天地間惟桂尤其雄將由巖竅多或是地形穹不
知起何處但覺來無窮浮埃晦白晝奇響擊半空一怒
動旬浹小亦數日中城堞凜欲壓況此半畝宮嘗聞古
至人御行猶輕鴻劉季晚可憐擊筑悲沛豐我老斷恐

怕眠身等枯蓬飄擲付大塊奚必分西東

贈辰山道人

道人何為者寒暑一破衫髮白具老態口訥稀冗談我
陪小隊來猿鳥窺層嵐道人方掩戶燕坐彌陀龕迎客
不下山送客不出庵即之疑槁木面目寒巉巖贈錢漢
然謝有若投諸潭微言歲計熟收芋已滿籃斯人未識
字豈必曾遍參所立偶自高可倣倂與貪

林容州別墅

出郭五里強治地十畝寬奇峰面朝挹高阜背屈蟠忽
獻若神授久閑由天慳茲焉卜壽宮朱堊浮林端使君
世慮淡出嶺顏如丹靜思三窟危孰如一丘安蒔松既
森秀引泉亦甘寒願言奉巾屨暇日來盤桓

還珠洞

呂愿中

朝野樂昇平園林窮勝討快雨洗塵埃秋山淨如掃游
魚聚江灣飢鳥集木杪羣芳鬱崢嶸一水翠繚繞雲頭
蒼狗變龍蛇亂天矯巖洞真奇崛造物逞天巧近在堂

輿間超然類三島暫舍簿書忙何時脫紛擾靜聽黃鸝
鳴一聲還復悄纚維去咫尺涉步即幽窈新岸暗蒼苔
喬木蔽蘿蔦山腹有遺祠隱然見華表筍輿訪崇臺空
曠遊遐眺八桂困焦蘇歎息心為慙任侯三蜀秀永壺
湛春曉有藥駐朱顏可以長不老雄篇頃刻成舉座悉
稱好戛玉副鳴球士夫善傳道五嶺類觀東一覽衆山
小呂巖何興廢事固有前兆新詩刻翠珉異日可稽考
玩珠紀勝遊聊復醉清醪

還珠洞

任續

山林自空閒遊人事幽討岫幌與雲關來蹟可堪掃良
離矗孤峰玉簪倚天杪桂水流灘碧洄伏皆縈繞豁訝
巖穴深虬龍雙天矯坤倪露幽秘造化殫奇巧勝概絕
塵寰彷彿蓬萊島悠悠世俗情是非苦膠擾水中螭何
罪徒勞卹心悄人厄困無妄礫石埋深窈風月幾年恨
山光慘蘿蔦星郎大嶽孫長城隱南表戎旃整且暇高
情恣登眺郊垌擁小隊一見顏色愀舊觀俄頃復洞戶

天重曉傷心日月過人世幾番老山川不相似歲久依然好呂巖標強名往事人能道孟公漫驚坐子夏冠非小桃符錄餘慶邨勝成濮兆冥數今乃驗常幸定誰考哦詩記貞石則有若樽醪

漱玉巖

胡寅

山限混華夷夷水不得出澗壑相舂撞竟朽此山骨想其初洞達借勢有神物劈開蒼石壁黥黥烏龍窟奔流成長溪巖洞寒突兀秉燭千步游怪景纔彷彿華鬢結

乳頂空翠誰掃拂石田耕未熟石鼓音不沒靈仙已羽
化古廟凜紆鬱我來庚伏初弄水解纓紱清甘流渴肺
妙聽隱琴瑟兩腋御冷風回首歎飄忽

虞山

方信孺

西風攪桂樹落日明楓林遊子懷歸期予悲渺登臨虞
山一何高湘水一何深英皇僅枯塚寂寞薰兮琴我欲
奏古曲俗耳更哇淫古器不可見聊作相思吟相思長
相思相思無古今一歌衆鳥聽再歌萬籟暗推手君勿

歌有酒且孤斟落落此時意寥寥千載心五絃毋容絕
四海誰知音

全州觀風樓

陳峴

江源發蠻荒來與湘灌遇交流趨城隅清映日東注羣
山半楚越馳驟若競赴譙門百步南樓堞此雄踞觀風
久標名棟宇初改故極目渺塞嶺蔚起矗雲霧千里聳
翠碧衆水橫練素古寺帶林薄漁艇依野渡村墟互隱
見風烟自朝暮東西亘井絡碁分雜營戍偶值豐登年

樂此保生聚秋風黃花天良集盛簪屨有觴固匪虔藉
此山水具登臨方興深諸君幸少駐

月巖

趙師恕

睠此巖壑勝領客共登臨危棧臨不測巖塗歷嵌巖俯
仰極高低上下窮幽深來登空明山千崖正沉沉下瞰
青羅江古木鬱蕭森清風萬里來層雲盪孤襟有客可
共賦有酒可自斟此景豈易得此樂豈易尋吾生今老
矣遁迹歸窮岑一棹下瀟湘此別意難任別後無相忘

詩成寄郵音

與鄉人宴集彈子崑中作

徐夢莘

江西鄉人同仕廣右者十有二

李蹊成叔郭有憑充誠潘修文叔李石韞

王徐夢莘商老王璪季文張坦明仲蔡詵子羽陳公璟師宋魏沐董父王思詠詠之孟浩養直

淳熙

重光赤奮若仲秋中澣講鄉會於湘南樓過彈子崑

吾儕生江南遠近且鄰鄉一官皆為貧餬口走四方遇

合良獨難動如參與商誰知自有時朋盍聚炎荒外臺

參計畫幕府佐紀綱出宰得壯縣司教涖郡庠曹掾勝

三語簿領真仇香不止似人喜頓覺吾輩張合坐尊序
齒避席敬行觴崑洞縱登覽杖屨陪徜徉棋矢以相娛
嘯歌情意長舉酒起祝規愛我藥石良古人尚植立君
子道其常平生學忠孝餘力從文章臨節不可奪當官
有何強窮乃見節義老當志彌剛鴻鵠在寥廓騏驥終
騰驤願言各勉旃事業要輝光他日光上道富貴無相
忘

癸水亭

曾宏正

危亭倚崑隈聲名叶地讖時浮桂藕香永絕戈甲侵敗
柳裊烟絲枯荷立霜枋呼童理吳榜日月數乘興

白龍崑

老仙乘白龍飛入白雲鄉崑前刻舟痕遊子常彷徨清
商韻風松疑有笙鶴翔我欲往從之居然塵鞅韉酒闌
下山去回首空慨慷

訪鄒道鄉故居

徐俯

十一月九日攜二豎子邀單秀才步出古觀之西北

求鄒侍郎忠公寓舍于拾青閣故基

履霜頗强健晨興恣所適
雨兒休籃輿呼客同蠟屐危
橋出隘巷憑高聊物色蒿然但林莽蕪廢長荆棘井竈
那復遺江山依舊碧要知千載下懷賢求所歷

雉山

章峴

營丘水墨師不識桂林山
半世閱渠畫今始陋堅頑嶺
邊千竒峯濃紺梳雲鬢肩輿兀醉夢所窺纔一班偶投
雉巖宿洞穴窮孱顏旁通赤明天南極地所寰更登雲

外頂下視江灣灣羣仙無我笑畏汝碧玉環我久墮塵
網歲晚嗟良難往來等幻化南北俱鄉關却憐雪花兒
三生此山間願力不汝無永悟無所還

訪僧雲歸庵

陶崇

閒過選佛場歸雲翠如潑入門偶有言啓頗師便喝掩
耳煨芋爐但把火深撥呼童酌玉虹注之旃檀鉢噓灰
然微紅橫鐺水煎活茶酣登甲亭雙眸為之豁鳥啼空
山幽翔來集木末風月一何佳團圞共批抹悠然澹忘

歸于茲得解脫

賓州

元

陳孚

賓州大如斗青林掩蒼靄亂石熊豹蹲累累漱江瀨野
姬碧裙襦聚虛擁野外青筠羅米鹽飄飄雙繡帶日晚
投古驛酸風不可奈綠竹亂生枝離披影如蓋瘴雨飛
為塵鴈鷗聲噦噦府僚跪庭前對我各一慨濁酒強為
飲旅魂如可酹故園何日還白雲繞吳會

和韻遊柳山書院

張鎭

清湘古精廬彷彿傍城郭三江淼漭迴羣峰勢飛躍濕
翠滴松梢淡靄籠日脚石泉走方池野色入疎箔玉堂
霧隱仙驄馬轡絲絡翰墨光照人氣象迥非昨祥鸞欲
騰空老兔初解縛青山與流水千載知獨樂

過清湘呈郡侯諸公

李巖

昨經衡永問田野多荒蕪居民竄山谷所至皆虛廬山
深聞賊鼓警戒憂不虞今朝抵湘城眼明人意紓風烟
接村落川原散耕夫青紅間花柳山花開畫圖胡為百

里外治亂乃爾殊桓桓翟將軍年高雪生鬚文功與武
績歷歷皆可書王君人中龍及瓜初此趨石侯復李侯
經綸材有餘古稱治在人此言良不虛我從日邊來遠
使天一隅名藩閱人多公齋曉星疎惜無薦賢書弗得
分龍魚作詩紀佳政庶可聞上都

遊柳山書院

宋 渤

公餘雨方歇策馬城北郭柳侯讀書處魚鳥尚欣躍鑿
池引泉流種樹滿山脚穹堂峙翠阜風霧棲軒箔湘南

富奇峰湘山互經絡斯文自元氣萬古猶如昨相從二
三子暫解塵纓縛廓我仁智心飽此山中樂

粵西詩載卷三